



Članovi Regine na press konferenciji: Bojan Miličević, Davor Ebner, Aleksandar Čović i Denis Čabrić

Idemo po pobjedu

Nakon što su u specijalnom programu BH Eurosong show 2009. premijerno izveli pjesmu, članovi Regine bili su prezadovoljni prvim reakcijama publike

Popularna sarajevska grupa Regina s pjesmom *Bistra voda* predstavljat će BiH na Eurosongu, koji će se u maju održati u Moskvi.

“Nadamo se da ćemo ove godine uspjeti odnijeti pobjedu i ovo prestižno takmičenje dovesti u Sarajevo. Još nemamo tremu i nadamo se da će tako i ostati. Tek nam sada predstoje velike pripreme. Iako ćemo *Bistru vodu* u Moskvi izvesti na bosanskom jeziku pjesmu ćemo, radi što bolje promocije, snimiti još na ruskom i engles-

kom”, kazao je Davor Ebner, na press konferenciji, nakon predstavljanja pjesme bh. javnosti.

Šef delegacije BH Eurosonga Dejan Kukić ističe da je *Bistra voda* ozbiljna i snažna pop pjesma, kvalitetna u produkcijskom, muzičkom i aranžerskom smislu. Prošlogodišnji predstavnici na Eurosongu, koji se održao u Beogradu, Mirela i Laka, dali su punu podršku svojim nasljednicima, za koje vjeruju da će postići dobar uspjeh u ruskoj prijestolnici.

Avantura se nastavlja

Tuzlanski fotograf, snimatelj i moreplovac, Senad Švraka, koji se trenutno nalazi sa svojom malom ekipom na putu po Sahari, ponovo nam se javlja s najnovijim vijestima. Tuzlanski Barba, koji je zamijenio jedrilicu za kamilu, obavještava nas da se putovanje odvija bez problema, a da je palo i prvo kupanje u Atlantiku, na pješćanoj plaži u mjestu Sous Massa.



Adnan Sejfić, Armin Muratović i Senad Švraka

Inače, putovanje ih je odvelo do mjesta Tiznit. Došli su do samog kraja gusto naseljenih predjela zapadnog Maroka, gdje počinje Sahara. Pred Barbom i ostalim članovima ekipe sada se nalazi oko 1.500 km

uglavnom pustih prostora, sve do Mauritanije, gdje je i kraj asfalta. Maxi je medijski partner ovog hrabrog podviga, pa već u sljedećem broju donosimo nove vijesti s ovog uzbudljivog i nesvakidašnjeg putovanja.

Otvoreno prvenstvo frizera BiH

Lanac frizerskih salona Šabić, u sklopu otvorenog takmičenja frizera BiH, koji će se održati 15. marta u sarajevskom Domu mladih, upriličit će i reviju frizura u sklopu koje će biti predstavljene najnovije frizure za proljeće-ljeto 2009. Iako prijave za ovo takmičenje, koje organizuje lanac frizerskih salona Šabić i Savez frizera BiH, još uvijek pristižu, već sada je poznato da će se u Domu mladih, pored frizera iz cijele



Mehmed Šabić, direktor Akademije Šabić

BiH, pojaviti neka od najeminentnijih frizerskih imena iz Makedonije, Srbije, Crne Gore, Hrvatske i Slovenije. Na ovom takmičenju birat će se i članovi bh. reprezentacije koji će se takmičiti na Evropskom kupu u Atini 30. maja. “Predstavnici Saveza frizera BiH, kojeg predvodi predsjednica Dragica Vasić, već davno su ostvarili sve potrebne kontakte s organizatorima Evropskog kupa, kako bi i naša reprezentacija nastupila na ovom značajnom takmičenju. Moram naglasiti kako, na zadovoljstvo svijeta, naš Savez zaista radi i funkcioniše odlično”, kaže Vahidin Šabić.

Kafa u Zelenoj dolini

U sarajevskoj Zelenoj dolini, održano je februarsko sijelo, posvećeno kafi. Uz nezaobilazne sevdalinke i tradicionalna bosanska jela, društvo okupljeno u ovom ugostiteljskom objektu uživalo je u zanimljivim pričama o tome koliko je kafa bitna za normalne međuljudske odnose i kako se nekada sijelilo. Kafa mora biti crna kao noć, vrela kao pakao i slatka kao ljubav, kazali su organizatori. Ovaj vid druženja organizovan je u sklopu projekta koji ima za cilj da promovira ljepotu i neprolaznost bosanske tradicije života.



Organizator sijela Nebojša Perić i direktorica programa TV Alfa Borjana Mumin